

GUICHI URUPE BĒ SAN PABLO APÓSTOL USE'ELA'NĒ'N LAO CIUDAD CORINTO

BĒ Pablo guichi ni use'ela'nĒ'n
lao yaca ben' nao xneza Diuzi,
ben' nita' ciudad Corinto

1 NĒ'ēdi', Pablo, naca' ben'
bdĕ' Diuzi. Según ca re'ennĕ'
bdĕ'nĕ' nĒ'ēdi' ta tza'a tzetixogui'a
xti'idza' Jesucristo. NĒ'ēdi'lia' ben'
bichiro Timoteo, bĕndo' guichi ni
ta ise'ela'ndo'n lao le'e, ben' nao
xneza Jesús, ben' nita' ciudad
Corinto. Lĕscan' huase'ela'ndo'
guichi ni lao yugu ben' nao xneza
Jesús, ben' nita' yaca yedyi nebaba
Acaya. ²Rulidza' Xuziro Diuzi
lĕnĕ' Señor quiero Jesucristo ta
huela'iyaquĕ' le'e, cuĕchiyaquĕ'
chizi lu'u guicho laxta'ole.

Ni rnĕn ca guca quie
Pablo bedzagalaonĕ'

³Rionla'adyi'ro Diuzi, ben' naca
Xuzi Señor quiero Jesucristo. Lĕbĕ'
naquĕ' Xuziro, ben' yeyĕchi'la'adyi'
ra'o. Lĕbĕ'naquĕ' ben' ru'elĕ' ra'o
di'idza' žela'adyi' tuzioli. ⁴Con
bitezi tazĕdi raca quiero, hue'lĕ'
Diuzi ra'o di'idza' žela'adyi'
tacuenda gacaro hue' lĕrĕro

ben' tula di' idza' žela'adyi' bĕ'
raca tazĕdi quiejĕ'. ⁵Como dan'
redzagalaoro tazĕla cabĕ' ptzagalao
Cristo, lĕscana' tazĕla ru'elĕnĕ'
ra'o di'idza' žela'adyi'. ⁶Cana' raca
quiendo' tacuenda hue'lĕndo' le'e
di'idza' žela'adyi' yele xti'idza'
Diuzi gata' yela' naban quiele
tuzioli. Lĕscan' cati ru'elĕ' Diuzi
nĕto' di'idza' žela'adyi', lena' raca
quiendo' cuenda gacalĕndo' le'e ta
suele cati yedzagalaole con cabĕ'
redzagalaondo'. ⁷Nezindo' dyĕ'ĕdi
huaca tahuen quiele, como dan'
cabĕ' redzagalaole por nun quie
dan' naole xneza Cristo, cana'rĕ'
ru'elĕ' Diuzi le'e di'idza' žela'adyi'.

⁸Bichindo', re'enndo' inezile ca
tu naca tazĕdi guca quiendo' yaca
yedyi nebaba Asia. Tantozi guca
zĕdi gula quiendo', abedu fuerza
quiendo'. Bĕndo' pensari biyudyi
tazĕdi quiendo' gatindo'. ⁹Bĕndo'
pensari hora gatindo'. Cana' guca
quiendo' cuenda blu'e Diuzi nĕto'
cabĕ' reya'ala' sudyi'ilĕro tuzi lĕbĕ',
ben' useban ben' baguti. Bireya'ala'
gaquero huazuero cuinziro.

¹⁰Bapcuasa pcui'o Diuzi nĕto' ca

tamala raca quiendo' cati beyen guti ja benë' nëto'. Chi le'e rulidzale Diuzi por nëto', nezindo' biusan Diuzi ucuasa ucu'onë' nëto' mazara. ¹¹Lëscan' chi ja ben' zë rulidzajë' Diuzi por nëto', lëscana' ja ben' zë yëbijë' Diuzi diuxcalelo' nun quie dan' ruela'iya Diuzi nëto'.

Udixogue' Pablo bi guca quienë' dan' biuyoguë' ciudad Corinto

¹²Sundo' gusto como dan' nezindo' dyë'ëdi rnaondo' tu neza la'iya rdando' du guicho du la'adyi'ndo' lao yedyi layu niga. Lëscana' rdando' dya'a conlë le'e. Pues yela' ben' huen quie Diuzi gualënë' nëto' rdando' cana', cala ta racazi la'adyi'ndo' rdando'. ¹³Cabë' naca di'idza' ta bzundo' lë'ë guichi ni, nacan puro di'idza' ta gacale ulabale, ta gacale tzioñe'ele. Rbeza' dza tzioñe'elen dyë'ëdi. ¹⁴Pero banezile cabë' inia' le'e. Banezile cati yeguida Señor quiero Jesús, cana' le'e huazule gusto cabë' bëndo' nëto'. Lëscan' nëto' huazundo' gusto cabë' bële le'e.

¹⁵Tantozi ruxela'adya' baoyoñe'ele cabë' baodixogui'a le'e, lena' bia' pensari dza na'te guida' ideyuba' le'e luegozi tacuenda gaca chopala bedeyuba' le'e. ¹⁶Cana' guqueda' tu teza' tza' Macedonia tia' ideyuba' le'e. Na'ra cati yeza' Macedonia guqueda' yedia' yeyuba' le'e tatula. Cana' gunan le'e lato gacalële në'ëdi' ta tzu'a neza tza' estado Judea. ¹⁷Pero como biuzaque' tia', ¿cómo raquele bibia' pensari dya'a bibida' ideyuba' le'e? ¿Cómo raquele hua' pensari cabë' pensari rue ben' nao ta rnazin quie,

ben' ru'e chopala di'idza'? ¹⁸Pero naca Diuzi testigo quiendo' de que bibë'lëndo' le'e chopala di'idza'. ¹⁹Pues ži'i Diuzi, ben' naca Cristo, biru'enë' benë' chopala di'idza'. Lëdi'idza' quienë' rguixogue'lia' Silvano len Timoteo le'e. Nacan tali yugulu ca unë Cristo. ²⁰Lao na'a Cristo uzucazi Diuzi dužete di'idza' quienë' cabë' unë' huenë'. Quie lena' caora yeyuežero Diuzi, reya'ala' yëbironë' "can' gaca" tanun quie Cristo Jesús. ²¹Naca Diuzi ben' gun fuerza quiero ta inaoro xneza Cristo biidzebiro biusanron. Naca Diuzi ben' bdë' ra'o gacaro ben' quienë'. ²²Lëbë' gunnë' ra'o fuerza valor nacan ca quie tu sello quiero cuenda ulu'en tali nacaro ben' quienë'. Lëbë' bdze'në' Bichi Be quienë' lu'u guicho laxta'oro ta xela'adyi'ro gun Diuzi ra'o dužete ca unë' gunnë' ra'o.

²³Pero chi binetza'a ciudad Corinto cabë' bia' pensari dza na', rguntia' Diuzi naquë' testigo quia', cala bire'enda' tza'a. Por nun quie dan' reyëchi'la'adya' le'e biuya'a. ²⁴Cala re'enndo' huendo' le'e mandado ži'laza ca ta huele inaole xneza Cristo. Pues banaole xneza Cristo fuerte gula. Ca re'enndo' huendo' quiele, re'enndo' gacalëndo' le'e sule mazara gusto.

2 Quie lena' bia' pensari biguida' tatula ideyuba' le'e, porque chi guida' ideyuba' le'e, bisule gusto conlë në'ëdi' dan'rueñi ži tila' le'e. ²Chi tanun quie dan' bida' bedeyuba' le'e bisule gusto, ¿nuži yezu në'ëdi' gusto? Pues le'ezihuaca yezule në'ëdi' gusto, le'e ben' udila'. ³Por nun quie lena'

aose'ela' tu guichi laole dza na'te ta inezile ca naca pensari quia', porque bigu'unda' guida' ideyuba' le'e ta uzule në'ëdi' bayëchi' nun quie ca ruele. Ta nacalá mejor reya'ala' uzule në'ëdi' gusto. Chi zua' gusto, žela'adyi'ria' lente le'e huazule gusto yugulule. ⁴Cati bia' guichi dza na', tantozi guqueda' bayëchi', uredya' nun quie ca ruele. Pero cala aose'ela' guichi laole ta sule bayëchi', dechan' aose'ela' guichi laole ta inezile cabë' nedyë'tzegueda' le'e.

Ni rnën cabë' reya'ala' yezi'žero quie ben' bë tamala

⁵Pero chi nun quie tu ben' zu ladole guca tu bayëchi', pues cala tuzi në'ëdi' bzunë' bayëchi', pero lëscan' bzunë' lente le'e bayëchi'. Lena' inia' le'e como dan' bire'enda' hue'lia' le'e di'idza' zë. ⁶Cabë' castigo babële ben' na' cati begu'udi'le, con lëzin aodizunë' quie xquia quienë' cabë' bënë'. ⁷Na'ra mejorla yezi'žele quienë' yeyuele di'idza' žela'adyi' cuenda bira gaquenë' zi'laza biyezunë' gusto nun quie raquenë' bayëchi' gula. ⁸Quie lena' inia' le'e tatula, reya'ala' ulu'elenë' cabë' nedyë'ëlenë'. ⁹Aose'ela' guichi laole dza na' ta aodixogui'a le'e cabë' reya'ala' huele quie ben' na'. Cana' bia' le'e prueba ta inezda' chi zule dispuesto inaole huele cabë' nia'. ¹⁰Na'ra con nu ben' si'žele con bitit'zezi cabë' bënë', lëscan' në'ëdi' huezi'žeria' quienë', porque con nutezi ben' aoži'žia' quie, aoži'žia' quienë' lao Cristo por nun quie le'e. ¹¹Cana' hua' cuenda bisi' xan'

taxi'ibi' Satanás lato huelënan ra'o. Aneziro dyë'ëdi' cabë' nacan yela' mala quienan.

Biuzu Pablo gusto zunë' yedyi Troas

¹²Cati bdyina' yedyi Troas ta quixogui'a di'idza' quie Cristo, cana' guca blë'ëda' detzegue lato hua' dyin quie Cristo na'. ¹³Pero biuzu guicho laxta'ohua' gusto nun quie ta bibedila' bichiro Tito. Lena' gudya' ja ben' quie Cristo nita' yedyi na' aziya'a. Na'ra beya'a yedyi nebaba Macedonia.

Conlë Cristo huero gan lao xan' taxi'ibi'

¹⁴Reya'ala' yëbiro Diuzi diuxcalelo' nun quie conlë lëbë' nuelëro Cristo Jesús tuže huero gan lao xan' taxi'ibi'. Cana' use'ela' Diuzi ra'o ta quixogue'ro benë' di'idza' quie Cristo ta huebëljë' lëbë'. Lena' nacan ca quie tu ta rla' žixi žeo duže yedyi layu. ¹⁵Lëscan' ra'o, nun quie nacaro ben' quie Cristo, nacaro ca quie tu ta rla' žixi žeo rdyinnan ga zu Diuzi, rdyinnan ga zu ja ben' nao xnezë', ben' yeyo guibá. Lëscan' rdyinnan ga zu ja ben' birue quie xti'idzë', ben' yeyo lao gui' gabila. ¹⁶Quie ja ben' birue quie xti'idzë', ben' yeyo lao gui' gabila, naca di'idza' rguixogue'ro ca quie tu ta rla' bayatza gutin benë'. Pero quie ja ben' nao xnezë', ben' yeyo guibá, naca di'idza' rguixogue'ro ca quie tu ta rla' žixi žeo gunnan yela' neban tuzioli. ¿Nu gaca tzioñe'e cabë' nia' niga? ¹⁷Cala rdando' ruendo' negocio conlë di'idza' la'iya quie Diuzi cabë' rue zë ben' tula, pero nëto',

como re Diuzi cabè' inaro, rdando' rguixogue'ndo' di'idza' la'iya quie Diuzi du galo cabè' reya'ala' hue ben' use'ela' Diuzi. Ruendo' cabè' reya'ala' hue ben' rue dyin quie Cristo.

Ni rnèn cabè' naca quiero nun quie bega'ntza'olè Diuzi ra'o tacubi

3 Cati rnando'cana' ¿ca bi pensari ruele? ¿Ruele pensari ruendo' cuinndo' ben' ze? ¿O chi re'enle ulu'endo' le'e tu guichi ga rnèn nacando' ben' huen? ¿O chi re'enle inabando' le'e tu guichi cana' cabè' rue bala ja benè'?

²Bihuendo' cana', como dan' le'e cuinle nacale ca quie tu guichi ga rnèn nacando' ben' huen. Con tuzi le'e, na'ra gabira guichi rdziogue. Nacale ca quie tu guichi ta bë Diuzi bzunè'n lè'è guicho laxta'ondo' cuenda ulaba yugulu benè' len inezijè' bi re'en inan. ³Lëscan' nacale ca quie tu guichi ta bë cuin Cristo bënnè' nètò' ta usedyinndo'n. Binacale ca quie di'idza' ta bzu benè' conlè tinta. Nacale ca quie di'idza' ta bzu Diuzi neban lao na'a Bichi Be quienè'. Binacale ca quie di'idza' ta bzu Diuzi lè'è tu yo naca tabla dza na'. Nacale ca quie di'idza' ta bzu Diuzi lè'è guicho laxta'ondo'.

⁴Nacan dula'adyi'ndo' cabè' rnando' como dan' lao na'a Cristo sudyi'ilèndo' Diuzi. ⁵Quele fuerza valor quiendo' cuinzindo' ruendo' ca mandado hue Diuzi nètò', dechan' lèbè' gunnè' fuerza valor quienè' ta huendo' yugulu ca ta inanè' huendo'. ⁶Ulio Diuzi nètò' ta huendo' dyin quienè' nun quie dan' bega'ntza'olènè' ra'o tacubi. Cala

lao na'a ley bzu Diuzi lè'è yo dza na' bega'ntza'olènè' ra'o tacubi, dechan' lao na'a Bichi Be quienè', ben' yu'u lu'u guicho laxta'oro. Ca naca ley bzu Diuzi lè'è yo, lèley rchugulina quiero gatiro. Pero ca naca Bichi Be quie Diuzi, lèbè' gunnè' yela' neban quiero tuzioli.

⁷Bzu Diuzi ley quienè' lè'è yo pca'nnè'n lao na'a Moisés. Cati pca'nnè'n lao na'a Moisés, caora na' guca titi'tzegue laohuè'. Tanto guca titi'tzegue laohuè', biužaque' ina' yaca ben' Israel laohuè'. Pero la'acazi guca titi'tzeguena, beyulacazin. Tanto nacan belao lèley na', conlè xni' quie Diuzi bdyinnan, la'acazi rchugulina quiero gatiro, ⁸pero mazara belao'tzegue naca di'idza' pca'n Bichi Be quie Diuzi para ra'o. ⁹Quie lena' inaro: Chi guca ley na' belao dza na', lèley na' rchugulina quiero gatiro, na'ra nacara belao'tzeguera lèdi'idza' rguixogue'n ra'o ca rue Diuzi zunè' dispuesto ta ilè'ènè' ra'o ben' laxta'o yèri. ¹⁰Lèley na' gucan belao dza na'te, pero biutila ley na' conlè lèdi'idza' rguixogue'n ra'o zuè' dispuesto ta ilè'ènè' ra'o ben' laxta'o yèri. Lena' nacaran belao'tzegue quele ca ley na'. ¹¹Pues chi lèley na' gucan belao dza na'te, la'acazi tu chi'zi unabè'na, na'ra belao'tzeguera naca ta inabè' tuzioli. ¹²Nun quie dan' nezindo' nacan tali cabè' nando', quie lena' birdzebindo' rguixogue'ndo' xti'idza' Diuzi zaca'lao lao ja benè'. ¹³Biruendo' nètò' cabè' bë Moisés. Ptaconè' tu la'ari' laonè' ta biillè'è ja ben' Israel laohuè' cati beyulan bira guca titi'n, porque decazide

yeyulacazin. ¹⁴Pero biuyoñe'e ben' Israel, ben' unita' dza na'. Lëscan' na'a birioñe'e ja ben' Israel cati rulabajë' lë'ë guichi ga rguixogue'n quie dza bega'ntza'olë Diuzi xuzixta'ojë' tiempote. Birioñe'ejë' nun quie nechula guichojë'. Bineduba guichojë' tachula, como dan' ruen zi inaoro xneza Cristo, na' yeduban. ¹⁵Hasta lente na'a, cati rulaba ben' Israel di'idza' bzu Moisés lë'ë guichi, nenechula guichojë' netza'la rioñe'ejë'n. ¹⁶Pero cati inaoro xneza Cristo, na' yeduba tachula guichoro. ¹⁷Cristo naquë' Bichi Be quie Diuzi. Nu ben' yu'u Bichi Be quie Diuzi naquë' libre. ¹⁸Quie lena' ra'o yuguluro, como abeduba tachula guichoro, nacaro ca quie tu yaohuan rseni'n gui', pero gui' quie yela' bala'ana quie Cristo rseni'ro. Cana' naca quiero yedyinro gacaro mazara ca naca Cristo, porque yugu dza raca quiero runnë' ra'o yela' bala'ana quienë'. Cana' rue Cristo, ben' naca Bichi Be quie Diuzi.

4 Quie lena' biyeyatendo' como dan' bë Diuzi tu cule quiendo' bdë'në' nëto' ta huendo' tu dyin quienë'. ²Bire'enndo' huendo' ta negachi' ta naca yela' stu'. Birzi'ndo' yë'. Birguixogue'ndo' ta binaca tali. Birguixogue'ndo' ta birna di'idza' la'iya quie Diuzi. Pues tuz ta naca tali rguixogue'ndo'. Quie lena' bisaque' ina ja benë' nacando' ben' mala. Ca ta ruendo', ruendo' lao Diuzi. ³Pero rna ja benë' nacan zëdi ta tzioñe'ejë' con cabë' rna di'idza' quie Diuzi rguixogue'ndo'. Rnajë' binacan quiejë' ta hue quieyaquë'n. Pero ben' gaca quie

lao gui' gabila, lëjë' raquejë'n zëdi rnajë' binacan quiejë' ta hue quieyaquë'n. ⁴Nun quie birue quieyaquë'n, bë xan' taxi'ibi' chula guichojë' cuenda bitzioñe'ejë' con cabë' ina di'idza' la'iya quie Diuzi, como dan' lëdi'idza' na' rguixogue'n quie Cristo. Tuzi Cristo nacarë' ben' bala'ana, ben' naca Diuzi guquë' benë', blë'ë yaca benë' lëbë'. ⁵Cati rguixogue'ndo' di'idza' la'iya quie Diuzi, quele rguixogue'ndo' ruendo' cuinndo' ben' že, dechan' rguixogue'ndo' yaca benë' de que naca Jesucristo Señor quiero ben' že. Na'ra ca raca quiendo' nacando' ca ben' rue dyin žan yu'u quiele nun quie nadyë'ëndo' Jesús. ⁶Naca Diuzi ben' bë mandado dza na'te ta galo gui' useni'na ga naca chula. Lëscan' naca Diuzi ben' bzioñe'e ra'o ca naca quienë' cuenda bira gaca guicho laxta'oro ca guicho laxta'o ben' rda lao lato lao chula. Cana' bënë' quiero cuenda yeyuebë'ro ca naca yela' huaca quienë'. Pues lëyela' huaca na'rue n rseni'na lao Jesús raca titi'n.

**Reya'ala' sudyi'ilëro Diuzi
dza rdaro lao yedyi layu**

⁷Pero tu ta naca huen gula, tu ta bzioñe'e Diuzi nëto', lena' yu'u lu'u guicho laxta'ondo'. Nacando' ca nu yeso' yu ta bide fuerza valor quie. Lena' rulu'en tali naca fuerza valor quiendo' fuerza valor quie Diuzi, cala quiendo'. ⁸Ba'ala'cazi de zëdi quiendo' con gati' tezi rdando', biyela'te quiendo'. Ba'ala'cazi rdëbindo' raquendo', biyeyatendo'. ⁹Ba'ala'cazi rue ja benë' nëto' bizinaquezi, biusanla'adyi' Diuzi

nëto'. Ba'ala'cazi quijë' nëto' layu, bisuecazijë' gutijë' nëto'. ¹⁰Con gati'tezi rdando' raca quiendo' cabë' guca quie Jesús re'en ja benë' gutijë' nëto'. Pero rute rusela Cristo nëto'. Lena' rulu'en zu Cristo nebannë' sëlënë' nëto', bibi raca quiendo'. ¹¹Pues yugu dza rdando' lao yedyi layu ruen žudyi guti ja benë' nëto' nun quie nacando' ben' quie Jesús. Cana' raca quiendo', como dan' cati bihue ja benë' gan gutijë' nëto', hualë'ë ja benë' zu Cristo racalënë' nëto'. Lente bël'ëla' žuba' quiendo' ta yeyudyi yedu quie, lena' rulu'en naca Jesús ben' run yela' neban quiendo' yugu dza. ¹²Nun quie rguixogue'ndo' di'idza' la'iya quie Diuzi, ruen žudyi guti ja benë' nëto'. Pero para le'e, nun quie rguixogue'ndo' di'idza' la'iya quie Diuzi, de yela' neban quiele tuzioli.

¹³Rnën lë'ë guichi la'iya quie Diuzi cani: “Rzudyi'ilia' con cabë' rna Diuzi. Quie lena' rguixogui'a ja benë' di'idza' la'iya quienë'.” Lëscan' cana' naca quiendo'. Tuzcazi naca pensari quiendo' len pensari quie ben' bzu di'idza' lë'ë guichi la'iya dza na'te. Rzudyi'ilëndo' Diuzi. Quie lena' rguixogue'ndo' benë' ja di'idza' la'iya quienë'. ¹⁴Cana' rnando' nun quie dan' nezindo' dyë'ëdi Diuzi psebannë' Jesús. Lëscana' nezindo' dyë'ëdi usebannë' ra'o nun quie dan' nacalëro Jesús tuže. Cana' yezi'në' ra'o ta tzesulëronë' guibá ga zuë'. ¹⁵Huaca huen quiele cabë' užacando' nëto', porque cati huela'iya Diuzi ben' zë, lëscan' ben' zë gaca yëbijë' Diuzi diuxcalenë'. Cana' huejë' Diuzi ben' že.

¹⁶Quie lena' biyeyatendo'. Ba'ala'cazi reyudyi redu fuerza valor quie bël'ëla' žuba' quiendo', pero yugu dza rudze' Diuzi fuerza valor quienë' lu'u guicho laxta'ondo'. ¹⁷Ca naca dza rdaro lao yedyi layu, la'acazi yedzagalaoztzeguero, lë'ëti'zi raca quiero nun quie dan' cati yezi' Diuzi ra'o, caora na' yeyaca dya'a te tela laohue quiero. ¹⁸Pues cala rzëla'adyi'ro gaca quiero ta de lao yedyi layu, dechan' tahuen hue Diuzi quiero guibá ga zunë', lena' rzëla'adyi'ro gaca quiero. Cana' huero como dan' ca naca ta de lao yedyi layu, hueyudyi huedu quien, pero ca naca tahuen hue Diuzi quiero guibá ga zunë', biyeyudyi biyedu quien.

5 Naca bël'ëla' žuba' quiero ca quie tu yu'u ga zuro, pero hueyudyi huedu quien. Neziro dyë'ëdi chi aodyiagui' bël'ëla' žuba' quiero naca ca yu'u, zu tu tacubi guibá ta biyeyudyi yedu quie. Nacan ta bë Diuzi, cala ta bë benë'. ²Tu raca nezuro lao yedyi layu, rzëla'adyi'ro usantro yedyi layu yeyoro guibá yezuro lu'u bël'ëla' žuba' cubi quiero. ³Cana' yezuro lu'u bël'ëla' žuba' cubi quiero ta iya'ro gacaro completo. ⁴Pero tu raca nezuro lu'u bël'ëla' žuba' gula quiero rdëbiro raquero bayëchi'. Re'enro usantro bël'ëla' žuba' gula quiero ta yezuro lu'u bël'ëla' žuba' cubi quiero cuenda yeyudyi yedu ca ta raca quiero lao yedyi layu, na' gata' tu yela' neban cubi quiero. ⁵Diuzi na' bzioñe'enë' ra'o ca huenë' quiero. Lëbë' bdze'në' Bichi Be quienë' lu'u guicho laxta'oro ta

xela'adyi'ro talicazi huenë' quiero ca unë' huenë' quiero.

⁶Quie lena' biyeyatero. Neziro tu raca nezuro lu'u bë'ëla' žuba' gula quiero, bisaque' yeyoro guibá tzasulëro Cristo. ⁷Rdaro rzudyi'ilëro Diuzi gacalënë' ra'o. Rdaro rzudyi'ilëro lëbë', birdaro rzudyi'ilëro ta ilë'ëro ta raca lao yedyi layu. ⁸Quie lena' nuxela'adyi'ro nacalan dya'a quiero gatiro cuenda yeyoro ta sulëro Cristo ga zuë'. ⁹Quie lena', huero bala ta inaoro huero puro cabë' re'en Cristo, la'acazi cati nebanro, la'acazi cati bagutiro. ¹⁰Cana' reya'ala' huero como dan' decazide yuguluro tziocaziro lao Cristo ichugulinë' quiero quie quiero, quižunë' ra'o cabë' ta bëro dza rdaro lao yedyi layu, chi bëro tahuen, chi bëro tamala.

Bega'ntza'olë Diuzi ra'o tacubila

¹¹Quie lena' como dan' neziro dyë'ëdi reya'ala' yeyuežero xa'nro Diuzi, cana' ruela'adyi'tzeguendo' ta huendo' gan inao ja benë' xneza Jesús. Pero banezi Diuzi ca naca pensari quiendo'. Lëscan' le'e, re' enndo' inezirële ca naca pensari quiendo'. ¹²Cala rnando' ruendo' že cuinndo', dechan' re'enndo' sule gusto cabë' ruendo' cuenda yequëbile quie nu ben' rnë contra nëto', ben' re'en ilë'ë ja benë' lëjë' ben' huen, pero bire'enjë' inezi ja benë' ca naca pensari yu'u lu'u guicho laxta'ojë'. ¹³Pero chi racando' luco cabë' najë', quie Diuzi na' racando' luco. Chi biracando' luco, na'ra lena' ruen huen quiele. ¹⁴Nun quie nedyë'ë Cristo ra'o,

decazide huero ca mandado ruenë' ra'o huero. Pues neziro dyë'ëdi guti Cristo lë'ë yaga cruzo lao laza yuguluro. Quie lena' ilë'ë Diuzi ra'o cabë' ben' bagutirë cati guti Cristo. ¹⁵Cana' bë Cristo, gutinë' lao laza yuguluro tacuenda bira huero tuz ta yega'nnan huen quiero, pero na'ra huero tuz ta yega'nnan huen quie Cristo, ben' guti beban para ra'o. ¹⁶Tanun quie lena', bira huero pensari ca pensari rue ja ben' nita' lao yedyi layu. Pues dza na'te bëro pensari naca Cristo benë'zi ca pensari rue ja ben' nita' lao yedyi layu, pero bira ruero pensari cana'. ¹⁷Lëscan' quie lena', chi nuelëro Cristo tuže, abetza' Diuzi pensari quiero, abecubinë'n. Baode quie pensari gula quiero, babeyu'uro pensari cubi.

¹⁸Cana' bë Diuzi bega' ntza'olënë' ra'o nun quie guti Cristo lë'ë yaga cruzo. Na'ra bdë' Diuzi nëto' ta tzetixogue'ndo' benë' de que zu Diuzi dispuesto yega'ntza'olënë' lëjë'. ¹⁹Cani inando': Por nun quie guti Cristo, bega'ntza'olë Diuzi yaca benëchi'. Quie lena' zu Diuzi dispuesto si'ženë' dula' xquia quiejë'. Ulio Diuzi nëto' ta tzetixogue'ndo' benë' cabë' bë Diuzi bega'ntza'olënë' lëjë'. ²⁰Quie lena' bdyinndo' laole gudyindo' le'e cabë' mandado bë Cristo nëto' ta yëbindo' le'e. Nacan ca quie cuin Diuzi rnënë' rëbinë' le'e cati rnando' rëbindo' le'e. Cana' mandado quie Cristo ruendo' bë' rëbindo' le'e: Ulega'ntza'olë Diuzi. ²¹Ni tu bibi dula' xquia bibë Cristo. Pero por nun quiero blë'ë Diuzi lëbë' ca ben' de dula' xquia quie, bënë' lëbë' castigo lao lazaro cuenda

caora nuelëro lëbë' tuže, cana' ilë'ë
Diuzi ra'o ben' bide dula' xquia
quie.

6 Quie lena', como nacando'
compañero quiele, ben' rue
dyin quie Diuzi, rnabayëchi'ndo'
laole bichu'unle tzala' la ca naca
tahuen re'en Diuzi huenë' quiele.

²Lë'ë guichi la'iya quie Diuzi
rguixogue'n ca una Diuzi cani:

Huadyin dza gaca huen gula
quiele, nacan dza cati yeda'
ulidzale në'ëdi'.

Huadyin dza ute usela' le'e,
nacan dza gacalia' le'e.

Cana' una Diuzi. Na'ra uzëcara
nagale porque abdyin dza gaca
huen quiele, abdyin dza ute usela
Diuzi le'e.

³Birguilondo' zëdi len ja benë',
bire'enndo' inajë' condre dyin quie
Diuzi ruendo'. ⁴Pero yugulu ca
ruendo' re'enndo' ilë'ë ja benë' nëto'
ben' rue dyin quie Diuzi. Re'enndo'
ilë'ëjë' nëto' cana' nun quie rzuendo'
dyë'ëdi cati raca tazëdi quiendo',
lëscan' cati redzagalaondo'
rdzioguendo' bi cosa. ⁵Pues guca
quiendo' benjë' nëto' zi', bdze'jë'
nëto' dyiguiba, bebiojë' nëto' yedyi,
bëndo' dyin zi'i gula, bigusindo',
uduendo'. ⁶Bablu'endo' nacando'
ben' quie Diuzi como dan' ni tu
tamala biruendo'. Banezindo'
con cabë' rna di'idza' la'iya quie
Diuzi. Nacaro ben' žela'adyi', ben'
huen, yu'undo' Bichi Be quie Diuzi,
nedyë'ëndo' benë' du guicho du
la'adyi'ndo', ⁷rguixogue'ndo' benë'
di'idza' la'iya quienë', ruendo'
yela' huaca quienë'. Dan' ruelëndo'
benë' puro tadya'a, lena' rdando'
laojë' birdzebindo' quixogue'ndo'jë'

xti'idza' Diuzi, birdzebindo'
ruendo' defender cuinndo' laojë'.

⁸Bayu'u rapala'n benë' nëto',
bayu'u birapala'një' nëto'. Bayu'u
rnajë' quiendo' ruendo' tahuen,
bayu'u rnajë' quiendo' biruendo'
tahuen. Bayu'u rlë'ëjë' nëto' ca ben'
rguixogue' tali, bayu'u rlë'ëjë' nëto'
ca ben' birguixogue' tali. ⁹Bayu'u
birzënegajë' quiendo', bayu'u
rzënegajë' quiendo'. Bayu'u ruen
žudyi gatindo', pero bigatindo'.
Bayu'u rusaca ja benë' nëto'
bizinaquezi, pero bisuejë' gutijë'
nëto'. ¹⁰Ba'ala'cazi raca bayëchi'
quiendo', pero zucazindo' gusto.
Ba'ala'cazi nacando' ben' yëchi',
pero gacalëndo' ben'zë. Ba'ala'cazi
zundo' abide quiendo', pero naca
quiendo' yugulu ta de.

¹¹Bicha', le'e ben' ciudad
Corinto, dyë'ëdi gula bë'lëndo' le'e
di'idza'. Du guicho du la'adyi'ndo'
nedyë'ëndo' le'e. ¹²Cala nëto'
bizundo' gusto conlë le'e, dechan'
le'e bizule gusto conlë nëto'.
¹³Rnabayëcha' le'e cabë' rue tu
xuzi xcuidi' lënë' ži'inë' ta idyë'ële
në'ëdi' du guicho du la'adyi'le
cabë' nedyë'ëda' le'e du guicho du
la'adya'.

**Nacaro ca quie tu idao'
rnabë'ra quie Diuzi**

¹⁴Bihuelële tuže len ja ben'
binao xneza Cristo. Rnaba' le'e
tu pregunta: ¿Ga huen dyin chi
huelë ja ben' rue ta yu'u ni'a xnezi
tuže len ja ben' birue ta yu'u ni'a
xnezi? ¿Biži huero gaca gui' lëbi
len tachula? ¹⁵¿Biži gaca hue Cristo
tuže conlë xan' taxi'ibi' Satanás?
¿Biži gaca hue tu ben' nao xneza

Cristo conlè ben' binao xneza
Cristo? ¹⁶¿Binezile binacan lèbi
idao' rnabè'ra re' ciudad Jerusalén
len ja ídolo? Pero læscan' le'e nacale
ca quie idao' rnabè'ra quie Diuzi,
ben' neban tuzioli. Cana' una cuin
Diuzi caora unè' cani:

Nè'èdi' sua' talia' le'e.

Nè'èdi' naca' Diuzi quiele,
nacale ben' tzionla'adyi'
nè'èdi'.

¹⁷Læscan' unarè Diuzi caniga:
Bihuelèle tuže conlè ben' birue
quie di'idza' quia'.
Bihuele cabè' ta naca žudyi
ruejè'.
Na'ra nè'èdi' huayezila'adya'
cabè' ruele.

¹⁸Cana' gaca' Xuzile, cana' gacale
ži'ina'.
Lena' una Diuzi, tuzi lèbè' de
yela' huaca quie.

7 Pues bicha', ben' nedyè'èda',
cana' naca di'idza' bega'nlē
Diuzi ra'o huenè' quiero. Quie lena'
reya'ala' gaparo cuidado bihuero
xquia. Naca xquia ca quie tu nidyi'
udyiagui'n bè'èla' žuba' quiero len
pensari quiero. Læscan' biusanro
huero Diuzi bala'ana, biusanro
naoro xnezè' du guicho du la'
adyi'ro.

**Ben' Corinto betza'jè' pensari
quiejè', bayu'ujè' pensari quie Diuzi**

²Uzècara nagale dyè'èdi' ca
inando' le'e. Ni tule bibèndo' quiele
tamala. Ni tule bibdyiagui'ndo'
quiele. Ni tule biuži'ndo' le'e yè'.

³Cala raohua' le'e xquia. Nacan
cabè' baonia' le'e dza na', nedyè'èda'
le'e du guicho du la'adya', la'acazi
chi nebana', la'acazi chi gatilia'

le'e. ⁴Lega redaohueda' zudyi'ilia'
le'e. Ba'ala'cazi neruen quiero
redzagalaoro, redaohuetzegueda'.
Lega gusto sua' conlè le'e.

⁵Desde dza cati bdyindo' yu
nebaba Macedonia, bibi yela'
huezila'adyi' guta' quiendo',
dechan' guta' tazèdi con gati'tezi
uyondo'. Raca huedila ga rdando',
rutèbin nètoto' rdzebindo'. ⁶Pero
reyuežela'adyi' Diuzi ben' raca
bayèchi' quie. Lena' beyuežela'adyi'
Diuzi nètoto', use'ela'nè' Tito
bedena'nè' nètoto' redaohuendo'.
⁷Pero cala tuzi redaohuendo' nun
quie bedena' Tito nètoto', læscan'
redaohuendo' como dan' le'e
beyuežela'adyi'le Tito. Una Tito
nètoto' cabè' re'enle ilè'èle nètoto'.
Læscan' una Tito cabè' raquele
bayèchi' rdèbile bi raca quia'.
Dan' rdèbile bi raca quia', lena'
reyuežela'adyi'le nè'èdi' mazara.

⁸La'acazi bzua' le'e bayèchi'
nun quie guichi use'ela' laole dza
na', biraqueda'n zi' na'a. Pero
chi guqueda'n zi' dza na'te nun
quie bzua' le'e bayèchi' tu chi'zi,
⁹redaohueda' na'a como dan'
nun quie lena', betza'le pensari
quiele bayu'ule pensari huen.
Lena' redaohue Diuzi cabè' bèle.
Lena' cala tamala bèndo' quiele
bzundo' bayèchi' quiele. ¹⁰Porque
cati ruzu Diuzi ra'o bayèchi', lena'
gacalèn ra'o ta yetza'ro pensari
quiero, yu'uro pensari quie Diuzi,
gaque quiero yela' neban tuzioli.
Lèpensari bayèchi' nacan pensari
quie Diuzi, bireya'ala' gaquero'n zi'.
Pero ca naca pensari bayèchi' raca
lao yedyi layu, lèpensari na' bihuen
quie ja benè' tadya'a. Huen quiejè'

ta gatijè' tuzioli yeyojè' lao gui' gabila. ¹¹Pero le'e bële tahuen caora bzu Diuzi bayèchi' quiele. Ulena' cabè' guca quiele. Dyè'èdi bële casa cabè' tamala guca quiele entre le'e. Du guicho du la'adyi'le udixogue'le cabè' guca quiele. Bdza'le bdzebile cabè' tamala guca entre le'e. Lagu'untele guida' ideyuba' le'e. Laozutele dispuesto huele castigo ben' bë tamala. Lena' rulu'en quiele gabi dula' napale tanun quie ben' bë tamala. ¹²Caora use'ela' guichi quia' laole dza na', bipse'ela'n nun quie tuzi ben' bë tamala, ni quele quie tuzi ben' bega'n yela' stu' quie tanun quie ben' bë tamala, dechan' use'ela' guichi quia' laole ta inezile cabè' rdèbindo' raquendo' quiele lao Diuzi. ¹³Pero nun quie cabè' bële, bële tahuen redaohuendo'.

Pero quele tuzi len redaohuendo', lëscan' redaohuendo' nun quie zu Tito gusto ca bële. Dyin quiele yugulule bega'n guicho laxta'onè' chizi. ¹⁴Bron huen cabè' agucha' Tito, agucha'nè' zua' contento conlè le'e. Na' gucan tali yugulu cabè' unando' le'e, lëscan' gucan tali yugulu cabè' gudyindo' Tito quiele de que zundo' contento conlè le'e. ¹⁵Lëscan' zu Tito contento conlè le'e caora reza'la'adyi'nè' le'e cabè' bële, bële ca ta unanè' quiele huele. Lëscan' zunè' contento conlè le'e cabè' bële uzi'lenè' dyè'èdi udapalenè' bala'ana. ¹⁶Lëscan' redaohueda' ca ruele zudyi'ilia' le'e.

Rguixogue' Pablo quie dumi ptupajè'

8 Na'ra bicha', re'enndo' hue'lëndo' le'e di'idza' cabè' bë Diuzi blu'enè' yela' ben' huen

quienè', bagucalënè' ben' nao xneza Jesús, ben' nita' yu nebaba Macedonia. ²La'acazi guca zèdi gula quiejè', lena' gucajè' ca prueba chi du guicho du la'adyi'jè' naojè' xneza Jesús, pero bipsanjè', nenaøjè' xnezè' nezujè' gusto gula. Ba'ala'cazi nacajè' ben' yèchi' gula, ptupajè' dumi že. Bèjè' ca ben' bibi rdziogue. ³Naca' testigo redaohuejè' ptupajè' ca tu uzuejè'. Pues mazara ptupajè' ca tu uzuejè'. ⁴Unabayèchi'jè' laondo' ta hue'ndo' lato gacalèjè' ben' bichiro, ben' nao xneza Jesús. ⁵Bèterajè' mazara ca tu guquendo' huejè'. Tanèro bega'nlèjè' Diuzi di'idza' ta hue quieyaquè' mazara quienè', lëscan' ta hue quieyaquè' mazara quiendo' según ca re'en Diuzi huejè'. ⁶Quie lena' unabando' cule lao Tito chi bisaque' guidè' useyudyinè' ideyubinè' le'e ta utupanè' dumi ca dumi uzulaonè' rutupanè' dza na'. ⁷Na'ra como dyè'èdi rue quiele xti'idza' Diuzi ca re'ennè' huele, como dyè'èdi zudyi'ilèle lèbè', como dyè'èdi rguixogue'le benè' xti'idzè', como dyè'èdi nezile cabè' nan, como dyè'èdi naole xnezè', como dyè'èdi nedyè'èle nètò', lëscan' dyè'èdi reya'ala' utuparèle dumi ta gacalèle yaca los demás ben' bichiro, ben' nao xneza Jesús.

⁸Quele nia' le'e rua' mandado zi'laza huele quie dumi cabè' nia'. Nia' le'e re'enda' inezile cabè' bë ja ben' tula, ben' nao xneza Jesús. Du redaohuejè' ptupajè' dumi. Lena' re'enda' inezile cuenda huele tuzi ca bëjè'. Lena' ulu'en quiele tali nedyè'èle Diuzi. ⁹Cana' re'enda' como dan' banezile dyè'èdi cabè' bë

Jesucristo quiele. Yela' ben' huen quiené' taže gualënë' le'e. La'acazi naca quiené' yugulu ta de quie Diuzi, bidé' deté'ë lao yedyi layu, guqué' ben' yéchi' nun quie dan' nedyé'ëné' le'e. Dyin quiené' huata' tadya'a gula quiele guibá ga zu Diuzi.

¹⁰Na'ra re'enda' inia' le'e ca naca pensari quia'. Baguca tu iza baozulaole dyé'ëdi. Bële huen ptupale dumi. Bële huen bedaohuele ptupalen. ¹¹Na'ra useyudyile utupale dumi yedaohuele cabé' bedaohuele dza na'. Utupale quie quiele ca tu ta de quiele. ¹²Porque chi tali re'enro hue'ro Diuzi gun, huayezila'adyi' Diuzi ca tu ta de quiero utuparo. Pues bigue'en Diuzi hue'roné' tu ta bide quiero.

¹³Na'ra nia' le'e reya'ala' gacalële laguedyile, pero quiele ta uca'n yéchi'le cuinle. ¹⁴Reya'ala' gacalële laguedyile cuenda gabi idziogue laguedyile, gaca tuzi ca ta de quiele len laguedyile. Pues na'a como gabi rdzioguele quiele, lena' reya'ala' gacalële laguedyile ben' rdziogue. Na'ra cati idyin dza idzioguele quiele, cana' iyacalëjë' le'e gunjë' ca ta rdzioguele. Cana' yugulule birabi idzioguele quiele. ¹⁵Lena' nacan cabé' rguixogue'n lë'ë guichi la'iya quie Diuzi cabé' bë Diuzi dza na', pchizané' ta naca ca yëta xtila ta gao ja ben' Israel. Lena' rnën lë'ë guichi cani: “Nu ben' bezi' tazë, bigucan sobre. Lëscan' nu ben' bezi' tadao' bicu'zi, bibdzioguen.”

**Use'ela' Pablo Tito len ja
compañero quiené'**

¹⁶Xcale Diuzi bdze'né' pensari lu'u guicho laxta'o Tito ta gacalënë' le'e

cabé' pensari yu'a ta gacalia' le'e.

¹⁷Na'ra yaxé Tito cabé' gucha'né' cabé' re'enda' huené' quiele. Como re'entzeguené' gacalënë' le'e, zuné' dispuesto ta sa'né' ideyubané' le'e cabé' gusto rapé'.

¹⁸Lëscan' ise'ela'ndo' itu ben' sa'llé Tito tuže. Ja ben' nao xneza Jesús nita' tu tu yedyi ga redupajé', lega raxejé' lëbë' nun quie dyé'ëdi rguixogue'né' bené' xti'idza' Diuzi. ¹⁹Cala tuzi len ruen lëbë' ben' huen, lëscan' bdé' ja ben' nao xneza Jesús lëbë' ta sa'llënë' nëto' tzaže utupando' dumi ta gacalëndo' yaca los demás ben' nao Jesús, ben' bibi de quie. Lena' baruendo' na'a cuenda huendo' Cristo bala'ana, lëscan' cuenda ulu'endo' cabé' racalë ben' nao xneza Jesús laguedyijé'. ²⁰Cana' re'lenndo' huendo' cuenda bigata' tazëdi ina ja bené' contra nëto' nun quie rzi'ndo' dumi. ²¹Pues yugulu ca ta ruendo' re'lenndo' tzu'un ni'a xnezi. Cala tuzi lao Diuzi re'lenndo' tzu'un ni'a xnezi, pero lëscan' lao ja bené' re'lenndo' tzu'un ni'a xnezi.

²²Conlë lëjë' ise'ela'ndo' itu ben' bichiro, ben' sa'llé lëjë'. Lëben' na' dyé'ëdi ablu'en quiené' zë lasa cabé' ruené' dyin quie Diuzi du guicho du la'adyi'né'. Na'ra maztera ruené' du guicho du la'adyi'né' na'a nun quie anuxela'adyi'né' le'e huele cabé' agucha'né' huele. ²³Chi inaba yaca bené' nuži Tito, na' yëbilejë' naca Tito ben' compañero quia', ben' ruelë në'ëdi' dyin quie Diuzi ca dyin ruendo' racalëndo' le'e. Lëscan' quie ichopa ben' sa'llé Tito, nacajé' ben' use'ela' laguedyiro ben' nao xneza Jesús, ben' rapa

Cristo bala'ana. ²⁴Nun quie ta inezi ja ben' nao xneza Jesús nita' tu tu yedyi, ulelu'ejè' cabè' tali nedyè'ële ben' bichiro ben' nao xneza Jesús. Lëscan' ulelu'ejè' napando' razón cati rëbindo' benè' zucazile dispuesto ta gacalële laguedyile, ben' nao xneza Jesús.

Re'en Pablo gacalè ja ben' ciudad Corinto, len ja ben' ciudad Jerusalén

9 Na'ra quie dumi reya'ala' utupale ta gacalële ben' bichiro, ben' nao xneza Jesús, biruguinte ise'ela' guichi laole le'e, ben' nita' yu nebaba Acaya, ²porque nezda' dyè'ëdi zule dispuesto utupalen. Redaohueda' yëpa' ben' bichiro, ben' nita' yu nebaba Macedonia, cabè' desde iza aode zule dispuesto gacalële laguedyile. Quie lena', ben' zëja, ben' Macedonia, zujè' dispuesto gacalëjè' laguedyijè' nun quie ca ruele le'e racalële laguedyile. ³Na'ra ise'ela' Tito len compañero quienè' laole cuenda gacalëjè' le'e utupale dumi huele tahuen cabè' agucha' ja benè' huele cuenda bigaca di'idza' falso cabè' agucha'jè'. Lena' nia' cuenda lahuatele bala cabè' baonia' le'e huele. ⁴Porque chi nequi'a bala ja ben' nita' yu nebaba Macedonia, bire'enda' ila'ndo' ilè'ëndo' bibèle bala biptupale dumi. Bire'enda' gaca yela' stu' quiendo' len le'e nun quie pxela'adyi'le nètò' utupale dumi, na' biptupale dumi. ⁵Quie lena' bia' pensari ruguinte inaba' cule lao Tito len compañero quienè' guidajè' ideyubijè' le'e cuenda gacalëjè' le'e utupalëjè' le'e dumi cabè' bega'nro di'idza'

dza na'. Cana' bade dumi puesto ta ulu'en bedaohuele ptupalen, quele ptupalen de la fuerza.

⁶Bigala'adyi'le con ca rnia' le'e: Chi gazaro tadao' bicu', lèzi tadao' bicu' usecho yezi'ro. Pero chi gazaro taže, lèzi taže usecho yezi'ro. ⁷Quie lena' quie quiele reya'ala' utupale dumi ca tu pensari yu'u lu'u guicho laxta'ole. Bireya'ala' utupalen canezi ni a la fuerza. Reya'ala' sule gusto utupalen, como dan' nedyè'ë Diuzi nu ben' ru'e gun quienè' gusto. ⁸Cana' huela'iya Diuzi le'e taže gula cuenda gata' quiele, bibi idzioguele. Lëscan' huela'iya Diuzi le'e ta gata' quiele gacalële ben' tula huelëlejè' tadya'a. ⁹Cana' rnèn lè'ë guichi la'iya quie Diuzi cani:

Taže racalè Diuzi ja ben' yèchi'.

Ca naca tadya'a ruenè' quiejè',
biyeyudyi yedu quien.

¹⁰Quie lena' rnia' le'e, naca Diuzi ben' run bini ta gazaro, lëscan' runnè' yela' huao ta gaoro. Lèbè' gunnè' quiele tacuenda bibi idzioguele gacalële benè' huelëlejè' tadya'a. ¹¹Cana' gata' yugulu cue' yela' uña'a quiele tacuenda gacalëlejè' taže. Quie lena' conlè dumi ise'ela'le lao na'ando', cana' yedaohuejè' yëbijè' Diuzi diuxcalelo'. ¹²Porque cati hue'rojè' ta ptupale ta gacalële lëjè', cala tuzi ta rdzioguejè' hue'rojè', pero lëscan' nun quie hue'rojè' ta rdzioguejè', lena' yëbijè' Diuzi diuxcalenè'. ¹³Cana' yeyuežèjè' lao Diuzi. Lëscan' cabè' bële quiejè', bë'lejè' ta bdzioguejè', lena' rulu'en tali rue quiele xti'idza' Cristo. Lëscan' yeyuežèjè' lao Diuzi por nun quie dumi že ptupale ta gacalële lëjè'

len yugu ja ben' nao xneza Jesús.

¹⁴Na'ra lějè' ulidzajè' Diuzi nun quiele. Zujè' gusto conlè le'e nun quie cabè' bèle quiejè', cana' ilè'èjè' naca Diuzi ben' huen. ¹⁵Xcale Diuzi dan' bëlènè' ra'o tadya'a. Tantozi bëlènè' ra'o tadya'a, bisuero saque' yëbironè' diuxcalelo' cabè' reya'ala' yëbironè' diuxcalelo'.

Una Pablo de yela' rnabè' quienè' naquè' apóstol

10 Nè'èdi', Pablo, nun quie naca Cristo ben' reyèchi'la'adyi', ben' huen, rnabayècha' laole uzènegale ca inia' le'e. Na'ra bala le'e rnale naca' ben' rna di'idza' gaxo cati zulia' le'e tuže, pero cati zua' zitu', naca' ben' rna di'idza' zi'laza. ²Tahuencazi chi', rnabayècha' laole uzènegale quia' dyè'èdi cati guida' ideyuba' le'e cuenda biruen zi ugunla'adya' pensari quieza' nun quie bala le'e raole nètò' xquia nale rdando' ruendo' ta racazi la'adyi'ndo', quele mandado quie Diuzi. Pues zua' dispuesto yela'lial'jè'. ³Talicazi rdando' lao yedyi layu, pero birdilando' ca rdila ja ben' rda lao yedyi layu. ⁴Netza'la ca ruendo' como dan' birzèndo' espada ca rzè ben' rda lao yedyi layu espada, pero napando' yela' rnabè' quie Diuzi. Conlè len suendo' udyiagui'ndo' ta naca fuerte gula rue contra Diuzi. ⁵Cana' huendo' gan ta tzioñe'e ben' binuebè' Diuzi con cabè' rna xti'idzè'. Cana' huendo' gan quie nutezi ben' zè', nutezi ben' rudzun inezi ja benè' con cabè' rna xti'idza' Diuzi. Cana'huendo' gan ulu'endo' benè' netza'la naca pensari quie

len pensari quie Cristo. Cana' huendo' gan ulu'endo'jè' ruguinte yetza'jè' pensari quiejè' ta yeyu'ujè' pensari quie Cristo inaojè' xnezè'. ⁶Como banezile dyè'èdi con cabè' rna xti'idza' Diuzi, na'tera zundo' dispuesto ta huendo' castigo nu ben' birue quie xti'idza' Diuzi.

⁷Le'e biruele pensari dyè'èdi. Chi nu ben' zu ladole unanè' bdè' Cristo lèbè' ta gaquè' apóstol, na'ra lèben' na' reya'ala' tzioñe'enè' de que lèscan' bdè'rè Cristo nètò' ta gacando' apóstol. ⁸La'acazi tazè lasa baonia' le'e ben Cristo yela' rnabè' quiendo', biredue'da' inia' le'e cana' tatula. Ben Cristo yela' rnabè' quiendo' ta uzioñe'endo' le'e ta inaole dyè'èdi xnezè', cala ta udyiagui'ndo' le'e. ⁹Bire'enda' huele pensari use'ela' guichi laole ta idzebile con cabè' inèn lè'èna. ¹⁰Le'e rnale nuzua' lè'è guichi puro di'idza' zi'laza, pero cati zua' ladole, rnia' le'e puro di'idza' gaxo, bireyažoga' inia' le'e di'idza' zi'laza. ¹¹Pero nu ben' rna cana', reya'ala' inezijè' dyè'èdi de que cabè' naca di'idza' ruzundo'lè'è guichi cati zundo' zitu', cana'cazi di'idza' huazaque' hue'lèndo' le'e cati zundo' ladole.

¹²Bireyažondo' utilizando' lèbi conlè lèben' rue že cuine. Pensari tondo ruejè' nun quie entre lèzijè' rlè'èjè' cuinjè' ben' že, entre lèzijè' rlè'èjè' cuinjè' ben' rutila lèbi. ¹³Pero cala con ganzi yëbindo' benè' bèndo' huen, bèndo' dyin quie Diuzi. Bè' Diuzi laze quie quiendo' ga si'ndo' huendo' dyin quienè'. Lèscan' laze quiendo' guidando' hasta ciudad Corinto gan'

zule. ¹⁴Quie lena' cala rdetelando' laohue cabè' mandado bë Diuzi guidando' gan' zule. Chi tali bibè Diuzi mandado guidando' gan' zule, lena' aodetelando' laohue cabè' mandado bënë' nètò'. Pero zanètò' bidando' tanèro bedetixogue'ndo' le'e xti'idza' Diuzi. ¹⁵Birnando' dyin bëndo' chi dyin bë ben' tula. Re'enndo' sudyi'ilèle Cristo mazara cuenda saque' uzioñe'endo' le'e mazara con cabè' naca mandado bë Diuzi nètò'. ¹⁶Cana' huaca tziondo' tzetixogue'ndo' di'idza' la'ia quie Diuzi ja yedyi nega'nra zitu' ga zule. Pero ga parte ga uyo ja ben' tula, baodixogue'jè' xti'idza' Diuzi, lègan' na' bitziondo' nètò' biyèbindo' benè' dyin quiendo'.

¹⁷Quie nu ben' re'en ina ja benè' nacajè' ben' ñe, mejorla inajè' Diuzi naquè' ben' ñe. ¹⁸Porque chi hue Diuzi ra'o ben' ñe, talicazi nacaro ben'ñe, pero chi huero cuinro ben' ñe, cala tali nacaro ben' ñe.

Una Pablo quie ja ben' huizi' yè', ben' na naca ja apóstol

11 Rnaba' cule laole uzènegale quia' dyè'èdi la'acazi chi raquele rnia' le'e pensari tondo. Con ca inia' le'e, huele cule uzènegale quia'. ²Naca dyin quie Diuzi nedyè'èda' le'e, lena' re'enda' usedyina' le'e lao Cristo biuyoguele ben' tula yè'. Re'enda' hua' quiele ca quie rue nu xuzi nigula. Reya'ala' usedyinnè' ñi'inè' cuidi' lao xquiubi' biuyogue ñi'inè' ben' tula yè'. ³Pero como conlè yela' sin' quie xan' taxi'ibi' guquen forma ca bëla uzi'n Eva yè', lèscan' rdèbida' utèbi ben' tula pensari quiele cuenda

usana'adyi'le bira inaole tuzi xneza Cristo du guicho du la'adyi'le. ⁴Porque dyè'èdi raxele ruzènegale cabè' di'idza' na nu ben' tula, nu ben' rida rguixogue' le'e netza'la cabè' udixogue'ndo' le'e quie Jesús. Pues dyè'èdi rezila'adyi'le quie bichi be tula, bichi be binaca Bichi Be quie Diuzi ta uyezila'adyi'le dza na'. Lèscan' dyè'èdi ruzènegale di'idza' rguixogue' ben' tula, di'idza' binacan lèbi con cabè' rna xti'idza' Diuzi unando' le'e dza na'. ⁵Pues rnia' cala zaca' nè'èdi' menosra cabè' nu ben' naole neza quie, nu ben' rnale naca apóstol huen gula. ⁶La'acazi ruen zèdi quia' ta hue'lia' le'e di'idza', cala binezda' con cabè' rna xti'idza' Diuzi. Lena' bablu'endo' ladole conlè yugute cabè' bëndo' laole.

⁷¿Bi ca nale? ¿Tamala bia' udixogui'a le'e di'idza' la'ia quie Diuzi, na' biunaba' le'e ni tu centavo? ¿Tamala bia', bedzagalaohua' cuenda gacalia' le'e gata' tahuen quiele? ⁸Hasta uzi'a dumi ta ben ben' nita' yedyi tula nè'èdi' cuenda tu de len bia' gasto udixogui'a le'e xti'idza' Diuzi. ⁹Catu uzulia' le'e dza na', bide ta hua' gasto, ni tule bibia' le'e zèdi inaba'le gunle quie gasto quia'. Pero ja ben' bichiro, ben' uza' yu nebaba Macedonia, lèjè' benjè' ta rdziogueda'. Cana' udapa' cuidado cuenda bihuelia' ni tule zèdi gunle ta rdziogueda'. Pues cana'cazi biusana' huelia' le'e cana'. ¹⁰Tantozì nužela'adya' nezda' dyè'èdi con cabè' rna di'idza' li quie Cristo, lena' nezda' nunu saque' udzun cabè' zua' gusto yèba' ja ben' nita'

yu nebaba Acaya ca naca tahuen bia' quiele. ¹¹Na'ra ¿bixquien' unia' cana'? ¿Nun quie binedyē'ēda' le'e unia' cana'? Cala lena'. Nezi Diuzi con cabē' nedyē'ēda' le'e. ¹²Biusana' hua' cabē' rua' la'acazi chi zu ben' na nacarējē' apóstol ca nēto'. Najē' de yela' rnabē' quiejē' ruejē' ca apóstol tu lēbizi cabē' nēto'. ¹³Pero binacan con cabē' najē'. Binacajē' dugalo apóstol. Yē'zi rzi'ljē' ruejē' cuinjē' ca apóstol quie Cristo. ¹⁴Lena' binacan ta yebanero, como dan' hasta cuin xan' taxi'ibi' Satanás yē'zi rzi'nē' ruenē' cuinnē' ca tu ángel rseni'n ca xni' gui'. ¹⁵Cana' biyebanero cabē' rue ben' naque quie xan'taxi'ibi'. Yē'zi rzi'ljē' ruejē' ca ben' rue tahuen. Pero hue Diuzi lējē' castigo con cabē' naca tamala bējē'.

Una Pablo cabē' užacayudyinē' dan' naquē' apóstol

¹⁶Rnia' le'e tatula: Bihuele pensari chi raca' luco. Pero chi cana' ruele pensari, ulegun lato inia' le'e ca rnē ben' raca luco cuenda hueria' pensari ca quie ben' hue cuine ben' že. ¹⁷Quele mandado quie Cristo rnia' cabē' rnia' ni. Rnia' ca quie ben' raca luco. Rnia' ca quie ben' rue cuine ben' že. ¹⁸Nun quie nita' ben' zē ruejē' ben' že cuinjē', lega raxejē' ta de lao yedyi layu, lēscana'rē nē'ēdi', hueria' ca quie ben' rue cuine ben' že. ¹⁹Cana' hua' como dan' le'e nale nacale ben' rioñe'e, nale huazuele dyē'ēdi huele gan ca na ben' luco. ²⁰Pues le'e redaohuele huele ca mandado zi'laza huegadyijē' le'e huele quiejē'. Redaohuele cati cubajē' ta

de quiele, redaohuele cati inabēljē' le'e ta zi'laza gula, redaohuele cati gacažēljē' le'e, hasta redaohuele cati capajē' laohuele. ²¹Pero reduce'da' inia' le'e nēto' bibeyažondo' huelēndo' le'e cana'.

Pero cabē' rue ja ben' na', ruejē' cuinjē' ben' že, lēscan' hueria' cuina' ben' že la'acazi ruen zi inēria' ca ben' luco. ²²Quie lena' inaba' le'e, ¿naca ja ben' na' ben' rnē di'idza' hebreo? Lēscan' nē'ēdi', rnēria' di'idza' hebreo. ¿Nacajē' ben' Israel? Lēscan' nē'ēdi', nacaria' ben' Israel. ¿Nacajē' ži'isuba Abraham? Lēscan' nē'ēdi', nacaria' ži'isuba Abraham. ²³¿Tali na' nacajē' ben' rue mandado quie Cristo? Rnia' le'e cala mandado quie Cristo ruejē'. Pero nē'ēdi' sí, rua' dugalo mandado quie Cristo. Ca rnē ben' tondo, cana' rnia' niga. Pues ganura zu rue dyin quie Cristo ca nē'ēdi'. Ganura zu rguijē' ru'ejē' zi' quie ca nē'ēdi'. Ga nu ben' zu rudze'ljē' lu'u dyiguiba ca nē'ēdi'. Tazē lasa bēn žudyi quia' guti ja benē' nē'ēdi'. ²⁴Hasta ben' yedyi quia', ben' Israel, bējē' nē'ēdi' castigo. Ga'yo' lasa udijē' nē'ēdi' galobechi ga huio guidi. ²⁵Tzona lasa udijē' nē'ēdi' yaga. Itu lasa udijē' nē'ēdi' yo. Tzona lasa betu barco yu'a lu'u nisadao'. Tu lasa užuba' lao nisadao' tu dza tu yela. ²⁶Zē lasa uza'a uya'a zitu'. Zē lasa ben žudyi quia' hua' yao že nē'ēdi'. Zē lasa ben žudyi quia' cuan ja benē' ta de quia'. Zē lasa ben žudyi quia' hue ja ben' yedyi quia' bizinaquezi len nē'ēdi'. Zē lasa ben žudyi quia' hue ja ben' yedyi tula bizinaquezi len nē'ēdi'. Zē lasa ben žudyi quia' ga naca ciudad, ga naca lao ya'a, ga naca lao

nisadao'. Zè lasa ben žudyi quia' nun quie ben' na najè' xneza Cristo, pero bè' nazijè'. ²⁷Bia' dyin zi'i guca zèdi quia'. Zè lasa bigusia' bedu yela. Zè lasa bedzagalaohua' udua'. Zè lasa bedzagalaohua' ubilida'. Zè lasa bia' ubasi. Zè lasa bedzagalaohua' nun quie tazaga. Zè lasa bedzagalaohua' nun quie bdziogueda' žaba'.

²⁸Cana' guca quia', pero bineyudyi ca tazèdi raca quia'. Yugu dza raqueda' rdèbida' quie ja ben' nao xneza Jesús nita' tu tu yedyi. ²⁹Chi zu ben' rdzebi inao xneza Cristo, yeyèchi'la'adya' lèbè' ca quie nè'èdi' naca' ben' rdzebi inao xneza Cristo. Lèscan' chi zu ben' bè yela' stu' quie laguedyi, na'ra nè'èdi' rdze'tzegueda' quie ben' bè yela' stu'. ³⁰Chi ru'en lato hua' cuina' ben' že, cana' hua' cuina' ben' že nun quie bedzagalaotzaguaia' užacayudya' bia' dyin quie Diuzi. ³¹Diuzi, ben' naca Xuzi Señor quiero Jesucristo, ben' rulidzaro ruero bala'ana laohue tuzioli, lèbè' nezinè' tali nacan ca rnia' le'e. ³²Cati uzua' ciudad Damasco, caora na' bè ben' naca gobernador quie rey Aretas mandado ta guida ja soldado gapajè' ru'a yedyi ga de neza ta guxujè' nè'èdi' huejè' nè'èdi' preso. ³³Pero ja ben' compañero quia', ben' nao xneza Jesús, lèjè' bdzejè' nè'èdi' tu lu'u chicuiti že, belizajè' nè'èdi' ru'a ventan zu lè'è besu ta zu nusio ru'a yedyi. Cana' guca ula' bibèxujè' nè'èdi'.

**Blu'e Cristo Pablo blè'ènè'
ca naca guibá**

12 Bibi zaca'n hua' cuina' ben' že, mejorla hua' di'idza'

cabè' blè'èda' blu'e Cristo nè'èdi' dza na'. ²Nè'èdi', ben' nao xneza Cristo, azio chida' iza, uquiè'nè' nè'èdi' guibá uyune. Binezda' chi uya'a len bè'èla' žuba' quia', o chi biuya'a len bè'èla' žuba' quia'. Tuzi Diuzi nezinè'. ³Pero nezda' uquiè'nè' nè'èdi' guibá, la'acazi binezda' chi len bè'èla' žuba' o chi cala len. Nezi Diuzi. ⁴Uquiè'nè' nè'èdi' na' ga beda' di'idza' naca la'iya gula. Tantozi naca la'iya di'idza' na', biru'en lato inè ja benè' ca naca di'idza' beda'. ⁵Na'ra lega redaohueda' cabè' guca quia' dza na', pero bire'enda' hua' cuina' ben' že nun quie len. Tuz ca guca quia' cati bedu fuerza quia', lèzin re'enda' yèpa' ja benè'. ⁶Pero chi hua' cuina' ben' že yèpa' ja benè' tahuen gula bèlè Diuzi nè'èdi' guibá, lena' binacan pensari tondo, como dan' tali cabè' guca quia' guibá yèpa'jè'. Pero bicala yèpa'jè' cana', como dan' bire'enda' huejè' pensari naca' ben' belaora ca tu rlè'èjè' naca'.

⁷Tantozi naca tahuen gula ta yebanero cabè' blè'èda' ca naca guibá, ben Diuzi nè'èdi' tu ta tzei ila cuerpo quia' cuenda bigaqueda' cuina' naca' ben' žera ca tu ta naca'. Nacan ca quie tu yèchi' tona uyu'un lu'u cuerpo quia'. Ruen quia' ca tu bichi be quie xan' taxi'ibi' Satanás rusacan nè'èdi' bizinaquezi. ⁸Tzona lasa unaba' lao Cristo ta huenè' mandado ta usannan nè'èdi' dan' yu'u ruzei rula cuerpo quia'. ⁹Pero una Cristo nè'èdi' cani: "Guna' luè' fuerza quia'. Conlè lèzin birabi idzioguelo', porque cati bide fuerza quio' cuinzo', cana' huazaque' guna' luè' fuerza quia'." Cana' redaohueda'

bide fuerza quia' cuenda gunnä' fuerza quienë' quia'. ¹⁰Quie lena' redaohueda' bide fuerza quia'. Redaohueda' cati rutasi runio benë' në'ëdi'. Redaohueda' cati rdziogueda' bi cosa. Redaohueda' cati rusaca ja benë' në'ëdi' bizinaquezi. Redaohueda' cati raca zëdi quia'. Cana' raca quia' nun quie rguixogui'a xti'idza' Cristo. Nezda' cati racabë'da' dyë'ëdi bide fuerza quia', caora na' run Cristo në'ëdi' fuerza quienë', pero mazara fuerza že run Cristo në'ëdi'.

**Rdëbi Pablo quie ja ben' nao xneza
Jesús, ben' nita' ciudad Corinto**

¹¹Ca ben' tondo bia', pero dula' quie le'e bia' cana', porque le'e reya'ala' inële tu cule quia'. Pues cala zaca' në'ëdi' menosra cabë' nu ben' naole neza quie, nu ben'rnale naca apóstol huen gula. Pero quie në'ëdi' rnale ni lë'ëti' gabi zaca'. ¹²Caora udixogui'a le'e xti'idza' Diuzi dza na', bëlia' le'e žela'adyi' gula, blë'ële bë Diuzi seña, bënë' yela' huaca, bënë' ta yebanero. Lena' blu'en tali naca' apóstol quienë'. ¹³¿Cala bëlia' le'e lëbi cabë' bëlia' ja ben' nao xneza Jesús nita' ga tula? Biunaba' le'e ta hua' gasto quia'. Tuzi lena' bibëlia' le'e lëbi. ¡Ulesi'že quia' cabë' tamala bia' quiele, biunaba' le'e ta hua' gasto quia'! ¹⁴Pues na'ra sí, bazua' dispuesto guida' ideyuba' le'e taoyune. Pero tatula na'a biunaba' le'e ta hua' gasto quia' como dan' quele ta de quiele re'enda', re'enda' huera quiele quie Cristo. Pues como raqueda' le'e ca ži'ina', lena' naca cuenda quia' hua' gasto quiele. Binacan cuenda

quiele huelële në'ëdi' gasto. ¹⁵Pues redaohueda' hua' gasto quia' cuinza'. Hasta zua' dispuesto hua' gasto fuerza quia' ta gacalia' le'e gata' tadya'a quiele. Pero cani raqueda': Ca tu mazara nedyë'ëda' le'e, cana' menosra nedyë'ële në'ëdi'.

¹⁶Pero bala ben' zu ladole inajë' ben' listo gula naca', najë' uži'a le'e yë' dza na'. Cana' inajë' ba'ala'cazi dyë'ëdi nezijë' biunaba' le'e ta hua' gasto quia' dza na'. ¹⁷¿Bi ca nale? ¿Uži'a le'e yë' nun quie nu ben' aose'ela' laole dza na'? ¹⁸Pues nezile aonaba' tu cule lao Tito chi biguidë' ideyubinë' le'e. Lëscan' use'ela' itu ben' bichiro sa'lënë' Tito. ¿Bi ca nale? ¿Uži' Tito le'e yë'? ¿Bi ca nale? ¿Quele tali na' në'ëdi'lia' Tito, tuzi ca bëlëndo' le'e, tuzi ca naca pensari quiendo'?

¹⁹Chi raquele rnando' aruendo' defender cuinndo' laole, bira huele pensari cana', como dan' biruendo' cana'. Ca ta ruendo' rnando' lao Diuzi nun quie nacalëndo' Cristo tuže. Pero yugu ca rnando' le'e nacan ta gacalen le'e ta huera quiele quie Cristo. Nedyë'ëda' le'e bicha'. ²⁰Rdëbida' chan' cati guida' ideyuba' le'e neruele ca ta bireya'ala' huele. Lëscan' rdëbida' idza'le në'ëdi' ca ta inia' le'e. Rdëbida' chan' gata' tazëdi. Rdëbida' chan' neruele gacažë'le laguedyile, chan' nerdza'le laguedyile, chan' neruele yela' adyi' len laguedyile, chan' nernële contra laguedyile, chan' neru'ele di'idza' bižu, chan' neruele cuinle ben' že, chan' neruele ta biyu'u ni'a xnezi. ²¹Rdëbida' gaca tastu' quia' ca ruele cati guida' ideyuba' le'e tatula. Rdëbida' huabedya' ca ruele chan' neruele cabë' dula' xquia' bële

tiempote. Rdëbida' chan' neruele tabayatza len yaca nigula, chan' nerdalële nigula binaca žgulale. Rdëbida' chan' nenaole ca naca vicio quiele unaole dza na'.

**Bë' Pablo lëjë' consejo,
bgapanë' lëjë' diuži**

13 Pues na' araca tatzona lasa rida' ideyuba' le'e. Biži ta yetilan di'idza' cati gao ja benë' laguedyijë' xquia, re'ennan chopatzona testigo ta gacan bala chi nacan tali, chi binacan tali. ²Zua' zitu', pero guna' le'e tu consejo tatula: Chi guida' ideyuba' le'e tatula, chi neruele dula' xquia, na'ra biyeyëchi'la'adya' le'e. Cana' naca consejo bi'a ben' bë xquia dza na'. Lëscana' naca consejo bëna' yugulule cati bida' dza na' bedeyuba' le'e tachopa lasa. ³Chi rnaban huelia' le'e cana', na'ra huata'cazi prueba ca prueba re'enle gata' chi tali rnia' lao na'a Cristo. Cala hue Cristo gaxo len le'e, dechan' ulu'enë' le'e cabë' naca yela' huaca quienë'. ⁴Tali na' guti Cristo lë'ë yaga cruzo ca quie ben' bisaque' hue defender cuine, pero yela' huaca quie Diuzi zuë' bebannë'. Lëscan' nëto' nacarë quiendo' ca guca quienë'. Naca quiendo' ca quie ben' bisaque' hue defender cuine, pero como dan' nuelëndo' Cristo tuzi, quie lena' babën Diuzi nëto' yela' huaca quienë' ta huendo' mandado ca mandado re'en Diuzi huelëndo' le'e.

⁵Ulehuecara pensari ca ruele chi du guicho du la'adyi'le rnaole xneza Cristo. Ulehue prueba cuinle. ¿Binezile zu Jesucristo

len le'e tuže? Pero bisulënë' le'e tuže chi de ladzazi rnaole xnezë'. ⁶Pues re'enda' inezile binacando' ben' huizi' yë'. ⁷Rulidzando' Diuzi ta nitu bi tamala huele. Cala binapando' rson rulidzando' Diuzi por le'e, pero ca ta re'enndo', re'enndo' huele puro tahuen, la' acazi raquele binapando' rson. ⁸Cana' re'enndo' como dan' bisaque' huendo' ta birutila lëbi len xti'idza' Diuzi. Pues puro cabë' rutilan lëbi ruendo'. ⁹Quie lena' redaohuendo' cati inaole xneza Cristo dyë'ëdi, la'acazi raquele nacando' ben' bide yela' huaca quie. Biusanndo' ulidzando' Diuzi por le'e cuenda gacalënë' le'e gacale ben' laxta'o yëri. ¹⁰Bia' guichi ni use'ela'n laole tu zaguidara' ideyuba' le'e cuenda cati sulia' le'e biinaban inabi'a le'e zi'laza conlë yela' rnabë' ta pca'n Cristo lao na'a. Bire'enda' usanla'adyi'le bira inaole xneza Cristo.

¹¹Na'ra bicha', hua' le'e tu despedida. Uleyue pensari quiele ga rapale falta, yeyuežela'adyi'le laguedyile, huelële laguedyile tuže, sulële laguedyile gusto. Cana' huapa Diuzi le'e cuidado. Naca Diuzi ben' cuëchi chizi laxta'oro nedyë'ënë' ra'o. ¹²Gapale diuži quie quie laguedyile dyë'ëdi, gaole xagajë' tu psitu. ¹³Yugulu ben' bichiro, ben' nita'ja len në'ëdi' niga, rgapajë' le'e diuži.

¹⁴Rulidza' Diuzi ta uca'n Señor quiero Jesucristo le'e huen. Nedyë'ë Diuzi le'e. Lëscan' zu Bichi Be quienë' conlë le'e. Amén.